



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 8

**Terrorism ya proxy
rara ka masü: Modi**

**Asian Athletics C'ships nung
Gulveer Singh-i gold angu**



VOL. XXII ISSUE NO. 223 (ADOK 223)

DIMAPUR

RASEMNÜ (WEDNESDAY)

MONUPII (MAY) 28, 2025

₹ 5.00

Ao Senden-i metetdaksür

Dimapur, May 27, 2025 (TYO): Ao Senden-i Aor senso ajak dang May 29, 2025 nü Mokokchung nung lungkak aitba sentong ka agitsü osang metetdaksüogo.

Iba sentong ya May 29 anepdang 10:00 ako Main Police Point Mokokchung nungi tenzüksü Deputy Commissioner office tonga aotsü. Idakji Deputy

Commissioner nem Nagaland sorkar dangi züluba shi ka agütsür sentong tembangtsü ta Ao Senden Tir Marsanen Imsong aser Tezülur Imtipokyim nati tanü sangdong ka nung ashi.

Iba sentong nung senso ajak adentsü mepishir ta Ao Senden mendenpurtemisa metetdaksü.

Mizo Territorial Army company tentettsü

Aizawl, May 27, 2025 (Agencies): Mizoram's Zoram People's Movement-i Mizo Territorial Army (MTA) company ana tentettsü aser MTA ajanga Mizoram nung mozü shibelenba aser ozüing alema inyaksangshiba azüoktsü.

Iba maparen atema MLA Clement Lalhmingthanga menden ser luden ka tentetogo aser pai ashiba agi Centre-i state sorkar nem MTA tentettsü temelaba agütsüogo.

MLA Lalhmingthanga-i aniba luden ajanga MTA offices aser camps atema ali bushiteper.

"MTA headquarters atema ali nguogo aser village council aikati ali tenlatsü mulunga lir" ta

Lalhmingthanga-i ashi.

"Drug trafficking aser tanga ozüing dak sendakba mapa nung yariteptsü atema Centre sorkari Mizo Territorial Army tentettsü mulunga agizükogo" ta pai ashi.

Chief Minister Lalduhoma-i Hombarnü New Delhi nung Defence Minister Rajnath Singh den ajurutepdang June ita nungi Mizo Territorial Army atema nübotem shimoktsü osang metetdakja liasü.

MTA ajanga Mizo lanurtem asoshi mapa agütsütsü ta CM Lalduhoma-i Rajnath dang ashi.

Rajnath Singh aser Union Home Minister Amit Shah nati Mizo Territorial Army tentettsü maparen nung yaritepba atema Lalduhoma-i pelaba metetdaksü.

COCOMI volunteers-i GSI Office nungpoka tur 'India' ojang agien

Imphal, May 27, 2025 (Agencies): Coordinating Committee on Manipur Integrity (COCOMI) züngsemtemi Lamphelpat nung Mongulbarnü Geological Survey of India (GSI) office nungpoka atu.

Parnoki office kishi kakkoker telungi ai aser official signboards nung "India" ojang agientsü merang. COCOMI-i Manipur maitsü ken o atema lungkak aitba nung iba ya shilem ka liasü.

Ketdangsürtemi tensa tamajungba küma moudaktsütsü atema security personnel mapa lemzüksü.

Manipur maitsü anema inyaksangshiba atema COCOMI-i lungkak aiter aser parnoki non-

cooperation movement tenzükogo.

Iba tatalokba atema Geological Survey of India ketdangsürtem nungi osang kecha mali aser ozüing amertemi tensa azüoktsü merangdar.

Coordinating Committee on Manipur Integrity (COCOMI)-i state ajungalen lungkak aitsü ayonga agia arudang Mongulbarnü tensa mejungi aküm. COCOMI volunteer temi Lamphel, Imphal nung Chief Electoral Officer office shibangtsüba ajanga mepetmesü adok.

COCOMI-i central government office tem shibangtsütsü bangzüing renemba ama volunteers-i inyaktsü tenzükogo.

Nagaland nung June 3 tashi tzüinglu arutsü

Dimapur, May 27, 2025 (TYO): Nagaland State Disaster Management Authority (NSDMA)-i May 27 nungi June 3 tashi Nagaland nung tzüinglu kanga arutsü osang metetdaksüogo.

May 27 aser 28 anogotem Shamator district nung tzüinglu kanga arutsü. Tanüingba tesemtem nung June 1 nungi 3 tashi tzüinglu kanga arutsü imlar ta NSDMA-i ashi.

Tesem kar nungbo tzüinglu den tsüingi aitsü aser tsüingmok atentsü. Anungji nübortemi tsüingi aser mopung tesashi nungi kümzüka alitsüla ta parnokisa

metetdaksüogo.

Tenemlen tzüinglu aruba ajanga Dimapur, Niuland, Chümoukedima, Bhandari, Baghty, Tizit aser Tuli dena lendenlen tzüimetsüing aser tziü atsüngenba timtem ajurutsü akok ta parnokisa ashi.

District Disaster Management Authorities (DDMAs) aser tanga department temi tzüingluruwa mongpu nung nisung taküm aser kiojen kümzüka ayutsü atema kümküma alitsü mepishir. Iba dak sendakba nung State Emergency Operations Centre (SEOC): Toll Free (1070) ajanga metetpelatsü akok ta NSDMA-isa ashi.

Arunachal kaketshirtemi 'Operation Clean Drive' tenzükogo

Itanagar, May 27, 2025 (Agencies): All Arunachal Pradesh Students' Union (AAPSU)-i anogo 30 atema state ajungalen "Operation Clean Drive" tenzükogo.

Iba mapa ya Arunachal Pradesh nung ozüing alema arurtem jangjatsü aser agientsü atema inyaker.

AAPSU General Secretary Ritum Tali aser ketdangpurtemi Arunachal Press Club nung osangbener den jembidang "AAPSU-i Arunachal Pradesh kübok district ajak nung rally aser verification drive ayonga agitsü" ta metetdaksü.

Parnoki Bangladeshi refugees aser Chakma-Hajong nunger dak

tenüing yoka iba mapa inyaktsü ta AAPSU-i ashi.

Union Ministry of Home Affairs (MHA)-i state aser Union Territory ajak dang Bangladesh aser Myanmar nungi arurtemi India senso ta ser aliba maitsü jangjatsü tetuyuba agütsüba den AAPSU-i inyakba campaign puteper.

MHA-i anogo 30 nü züngzüksüba tsüingda campaign agitsü ta AAPSU ketdangpurtemi ashi.

Chief Minister Pema Khandu dang memorandum ka nung Chakma-Hajong nunger aser ozüing alema arurtem aliba atema mapa inyaktsü nenshia metetdaksüogo ta Ritum Tali-i

ashi.

Item nisungtem ajanga Arunachal Pradesh sobaliba maitsü nung lendong bentsür arutsütsü aser külen Chakma aser Hajong nungeri parnok state nung alitsü temeten indang jembia arur ta AAPSU-isa ashi.

"Tang ya onoki Chakma-Hajong refugees tebilemtsütem atema tatembang lemtet ka aginür. Parnok ya Changlang district nung lisopurtem dang nungi teimba kümogo. Parnok settlement area nung dang lidaktsütsüla" ta parnoki metetdaksü.

AAPSU-isa ozüing alema arurtem kanga junga nüka mittsü takhangba agütsür.

Nagaland nung Entrepreneur Award 2024 agütsü



Industries & Commerce Advisor Hekani Jakhalu den ketdangsürtem aser Entrepreneur Award 2024 angurtem külemi agiba noksa angur.

Dimapur, May 27, 2025 (TYO): Department of Industries & Commerce-i May 27, 2025 nü Entrepreneur Award for 2024 sentong ayonga agiogo.

Iba sentong ya Directorate of Industries & Commerce Conference Hall, Kohima nung "Turning Ideas into Reality and Challenges into Opportunities" omen nung ajemdaker agi.

"Sempet angur ajak bendanga agüja inyakba aser tasen purapitetba atema tenüingsang agütsür. Entrepreneur Award 2024 takok ngua agitetba ya ajak külemi inyakba ajanga lir" ta Industries & Commerce Director, P. Tokugha Sema-i ashi.

"Nagaland sorkari iba sentong agitettsüsa teyari tulu agütsüba atema pelar. Iba sentong ya entrepreneurs-i loktiliba aser rongsenketzüing renlokba nung shilem tajung agiba ajiteta tetushi agütsür" ta pai ashi.

Külen Industries & Commerce Advisor Hekani Jakhalu-i iba sentong agitettsüsa inyakba aser sorkar nungi nüngdakba temelaba ajak meshiba atema pelar ta Director

Tokugha-isa ashi.

"Sorkari local entrepreneurship tajungba kümdaktsütsü aser inclusive development ajungkettsü atema tenangzükbä agia inyaker" ta Industries & Commerce Advisor Hekani Jakhalu-i ashi.

"Lokti tejakleni renloka aotsü atema entrepreneurs-i kanga meranga inyakba aser shilem tajung agiba atema tenüingsang agütsür. Entrepreneurs-i nenok inyakba wadang tajungba küma aotsü asoshi government schemes teyari agitsü ayongzüker" ta lai ashi.

Nagaland nung entrepreneur temi technology tasentem nung ajemoka inyaktsüla aser tajungtiba akümtsü merangtsüla. Sorkari lanur aser local entrepreneurs den yaritepa rongsenketzüing jenjang tajungba akümtsü mulunga lir. Maneni tanü sempet angurtemia nenok alizüing nung temulun agütsütsü aser entrepreneurs kümnürtem dang len sayua anitettsü ayongzüker" ta Advisor Hekani-isa ashi.

Entrepreneur Award 2024 angurtem:

Country Craft, Dimapur

nungi Aolemba Longkumer nem craft sector atema sempet agütsü. Naga handicrafts nung pa ya mezüingpur ka lir.

Entrepreneur School of Business, Dimapur nungi Seyielezo Putsure nem entrepreneur, educator, aser ecosystem builder atema sempet agütsü.

Dental Touch & Facial Aesthetics, Dimapur nungi Dr. Temjennungsang nem dental & aesthetic care atema sempet agütsü.

Fingerprint, Dimapur nungi Hongba Phom nem design & innovation ajanga lokti ajungketba aser indaktsüba atema sempet agütsü.

Naga Feather Pvt. Ltd., Dimapur nungi Ruovilhoukho Chuzho nem high-quality bamboo & wood products tajung yangluba atema sempet agütsü.

Veta Studio, Kohima nungi Huveta Huprem nem leather craftsmanship atema sempet agütsü.

Zunheboto nungi Khuhevi Khuju nem traditional design wazüka ayuba atema sempet agütsü.

Chümoukedima nung law & order tensa asadangba senden amen



Unity Village nung May 23, 2025 nü mepetmesü adokba mechi law & order tensa asadangba senden ka DPDB Conference Hall, Chümoukedima nung May 26, 2025 nü mena liasü.

Dimapur, Monupii/May 27 (TYO): Unity Village nung May 23, 2025 nü atalokba dak sendakba nung law & order tensa asadangba senden ka village councils, GBs, police aser security agencies tem den May 26, 2025 nü DPDB Conference Hall, Chümoukedima nung mena liasü.

Iba senden nung Deputy Commissioner, Chümoukedima, Ponal John ajanga iba anogo atalokba timtem ya ajak asoshi kanga tia maka aser temulung animesüngzükteter, aser yamala atalokba ajanga telok balalai nüburtem tangatetba mezüngshiba sayur, ta ashi.

Kin balala, forum mesüra union aser nübur ajunga yimjung asoshi ola adokba mapang aser GoI den yimjung ken o jembiba nung 'advance stage' nung alidang parnoki tashi angaa anidaksü özüng lir, ta pai ashi.

Iba ama tatalokba ya özüng alema lir aser özüng agi mela aliba ama merenshitsu temsüa lir, designated camp alema oa hadir bener senzüsü memelar aser ceasefire ground rules nung aibelenba lir, ta Chümoukedima DC ajanga ashi.

Iba yongji nüburtemi iba amala atalokdang ola adoker, saka maneni ataloker, kong yimtsüng ketdangsürtemi süoki ia bilema iba ama timtem mataloktsü ola adoker.

Iba ama atalokba ya aibelen tulu lir aser nüburtemi ashiba nung parnoki mangara meilongi

nüburtemi tamang makateti akumtsü. Parnoki ceasefire özüng nung tanen makai aibelenra, sorkar asoshi inyaker ama asenoki ceasefire monitoring group dangi abentsüsa akumtsü, ta pai ashi.

Village councils aser GBs temi temulung ronga bilemba lemsatepba aser shisa tajung agütsüba atema Chümoukedima DC-i pelaba lemsatep aser police nungi agütsüba osang tejangja temaba ketdangsür nem agütsütsü aser teinyaktsü tim shidak inyaktsü, ta ashi.

Ceasefire ground rules nungi totuyuba tejangja ka nüngdaker. Sorkar indang machinery ka asünung, parnoki anidaksüba protocols lir, anungji tetsükdaktsü lir, saka amalitep akatsü, yariteptsü aser nüngdakba lenmang agütsütsü ta ashi aser councils tem dang parnok representation aser ultimatum agütsütsü ayongzüka liasü.

Iba senden ya ajanga security forces, police aser district administration tsüngta tajungba nung amalitep akatsü imlar, ta DC-i ashi aser village councils tem dang administration, police aser security forces tem osang agitepa alitsü aser tarutsü nung iba ama lendong timtem ajurura, osangtsüsang shidak agitepa tekeraba nung mera agitsü ayongzüka liasü.

Law & order tensa dak sendakba nung security aser police forces ajanga osang agütsüdang, iba timtem ataloker

parnoki operations ahi, saka ceasefire ground rules nung aliba ama parnok teka alena lir aser ceasefire monitoring office telungi aittsü memela, ta ashi.

Sorkari osang tejangja ataa lir, anungji osang agütsüba sülen temaba ketdangsür nungi totuyuba agütsüba ataa alitsü, ta ashi.

Mapa tamajung jibo mapa tamajung lir, aser police temi junga meteta lir aser tapet mera agitsü, ta parnoki ashi.

Parnokisa tesem ajunga len tashiyim amshia senotsü saruba lir saka nisung katia ola madoker, anungji mapa tamajung inyakba atema yariteptsü lenirtem ayongzüka liasü.

Iba ken o nung aibelener aputsü police temi inyaktar aser item ken o tekeraba nung bentettsü, ta ashi.

Village councils tem nungia iba tatalokba indang khuret lemsatep aser parnoki nüburtem asoshi bilemstür ta ashi parnoki patta agientsü, amalitep makatsü aser yimtsüng nungi aridoktsü aser yimtsüng nung designated camp mayutsü tashi inyaktsü telemtetba agiogo ta ashi.

Iba tatalokba ajanga nüburtem kanga temulung shiranger, aser tarutsü nung maneni atalokra, nübur mulungba nung mapa inyaktsü. Aibelener ghonda 48 tsüngta aputsü atema FIR ka benoktsü pangjemogo ta ashi aser administration dang tarutsü nung iba ama matalokdaktsütsü ayongzüka liasü.

National Award PMRBP atema application meshir

Dimapur, Monupii/May 27 (TYO): Ministry of Women & Child Development, GoI nungi shiti aruba ama National Award, Pradhan Mantri Rashtriya Bal Puraskar (PMRBP) 2025 atema nomination meshir, koba July 31, 2025 tashinung arishi küm 18 tekübok aliba tanur temi Bravery, Social Service, Environment, Sports, Art & Culture, Science & Technology nung alakteta takok tajung angur nem iba sempet agütsütsü, ta Deputy Commissioner, Kohima, B Henok Buchem, NCS ajanga

sangdong ka nung metetdaksü. Sangdong ajangasa district department ajunga dang sempet aliba, talisa tajemzüka jenjang nung alir, SC/ST, tetsür aser divyang nisungtem nungi sempet tajung aliba jangjateta nominate asütsü ayongzüker, ta ashu.

Iba dak sendakba osang tali tejangjaba nung metetner temi Rorheu Peseyie, Sub-Divisional Officer (Civil) HQ, Kohima (9774416796), designated Nodal Officer for Pradhan Mantri Rashtriya Bal Puraskar (PMRBP) den tongteprateptsü akok, ta sangdong ajangasa ashi.

Kohima jila nung anogo ishika tzü agi timtemtsü



Dimapur, Monupii/May 27 (TYO): Kohima jila nung tzü supply agütsüba tongti line ka May 26, 2025 nikongdang raksaba ajanga anogo ana- asem tzü agi timtemtsü akok, ta sangdong ka ajanga ashi.

Osettsüset tejen akumba aser tzü tali ayimba ajanga Jotsoma reserve forest area nungi bener aruba pipeline poksa.

Executive Engineer, Urban

Division, Neilhoukholie Chielie ajanga nüburtem dang sangdong ka nung, akok tashi tekeraba nung iba timtem bentettsü asoshi Public Health Engineering Department (PHED) Urban ajanga maparen tenzüko, ta sangdong ajanga ashi.

EE ajanga nüburtem dang metokmeperi arema maneni ketdangsür den amalitep akatsü ayongzüka liasü.

Bengaluru nung Tandem Healthcare ajanga mozüki tasen ka yanglutsü

Bengaluru, Monupii/May 27 (Agencies): India nung mezüngbuba noklang shilem FDI Tertiary Care Hospital, Sakra World Hospital ajanga North Bengaluru nung mozüki tanabuba yanglutsü asoshi Tandem Healthcare dang melaogo.

Ali tasazük 6.8 lakh square feet nung 500-bed mozüki ya green biophilic hospital ka alitsü, kong garden lounges, green balconies, planters, arrival canopy aser awatsüng reprangtsüsa yanglutsü, koba ita 30 tsüngta renemtsü.

Iba mozüki ya sen 1,000 crore agi yanglutsü aser ibai Sakra ajanga world-class healthcare agütsütsü mission nung alizüng tajung ka tongteter alitsü, kong japan nunger technology amshir aser Secom Medical System aser Toyota Tsusho den lungjemer healthcare agütsütsü.

Mozüki taseenba ya G+9 floors alitsü, kong Indo-Japanese architectural elements meyoktepa alitsü, ta sangdong ja ajanga ashi.

Bengaluru nung iba Sakra World Hospital tasenba yagi

Comprehensive Cancer Treatment Program with LINAC, MR-LINAC, Gamma Knife, Brachytherapy, nuclear medicine, Interventional Neuro & Rehab, Cardiology, Mother & Child Programme amala densema yimya ajanga shiranger anepalutsü.

Mozüki nung paperless system amshitsü, RFID tracking, pandemic-preparedness, modular OTs integrated with the Building Management System for precise environmental control, aser comprehensive indoor air quality monitoring amala alitsü. "World-class healthcare facility yanglutsü mangdang aliba asangsang akumtsü asoshi Tandem Healthcare den lungjemer inyaktsü pelar," ta Managing Director, Sakra World Hospital, Yuichi Nagano-i ashi.

Marathahalli nung tang Sakra indang 350-bed tertiary care centre lir, aser facility tasenba renemba ajanga iba telok Bengaluru nung mozüki yipten 1,000 dak tema agütsütsü nükjidong aliba asangsang akumtsü.

Longleng nung DEF personnel atema training ka agütsü



Longleng nung District Executive Force (DEF) personnel atema "Procedures to Handle Criminal Cases" nung rangloker May 26, 2025 nü training agütsüdang tangokba noksa nung angur.

Dimapur, Monupii/May 27 (TYO): Superintendent of Police (SP) Longleng ajanga District Executive Force (DEF) personnel atema "Procedures to Handle Criminal Cases" nung rangloker May 26, 2025 nü tongtipang training ka agüja liasü.

Police tem bushisüngdangba aser procedural tsütsü tajungba kumdaktsütsü nükjidong nung iba training ya agüja liasü.

Training nung shisalen sayur Government Pleader cum Assistant Public Prosecutor, H. Donyei Phom ajanga criminal

matters nung legal protocols amshiyim DEF nem tajungba nung angatetdakja liasü.

Training tepiyong H. Donyei Phom-i özüng amshitem asoshi tongtipang onüktem ajak awajema jembia liasü.

Shilem agirtemi First Information Report (FIR) züluokba mapang amshitsü yimyatem, criminal proceedings tenzükdang nüngdakba documents amala tejangja angazük.

Maneni "Procedure of Investigation" indang

angazükdakja ketdangsür temi bushisüngdangba mapang nüngdakba mera jangja-jangja sayua liasü.

Police mapa nung "arrest" procedures indang kanga junga lemsatepa legal guidelines aser human rights shidak amshitsü, okadak bener arua kuli sayutettsüsa kuli bendentsü yimyatem sayua liasü.

Maneni "Prosecution of Accused" aser "Prosecution Sanction" inyakyim DEF nem tejangjaba nung angazükdakja liasü.



India nung Covid-19 menar tali kuma odor. Ministry of Health and Family Welfare-i sangdong ka ajanga India nung Covid-19 menar alir 1,010 jungogo ta metetdaksüogo. Data ajangasa tashidak menar ya timba Kerala aser Maharashtra nung aliba sayuogo.

Southwest Delhi nung Bangladesh nunger 92 sota ayu

New Delhi, Monupii/May 27 (Agencies): Delhi Police-i southwest Delhi nung meita aoba sentong ana benoka inyakba mapang ozüing alema linük nung liya aliba Bangladesh nunger 92 puogo, ta ketdangsürtemi Mongolbarnü metetdaksü.

Police-i ashiba agi, ozüing alema liya aliba bendangertem jangjateta aputsü atema Southwest district kübok tesem balala anogo ter tashi meita oa liasü.

Itangitertemi osang agütsüba dak ajemdaker aser local informer tem teyari agia police team temi tesem kar nung kishiai tua nüburtem maitsü jangjatsü atema jenjang agia liasü.

"Meita aoba mapang Bangladesh nunger 88, Sarojini Nagar, Kishangarh, Safdarjung Enclave, Vasant Kunj ,

Kapashera, Palam village, Delhi Cantonment aser Sagarpur nungi pua liasü," ta Deputy Commissioner of Police Surendra Choudhary-i ashi.

Ketdangsür yagi ashiba agi, ken o ashishiba mapang parnoki parnok India nung arua aliba indang kuli kaket tejangja magütsüteti liasü.

Parnok aika ket nung Bangladesh indang maitsü kuli kakettem bener liasü. Parnok takhangba tem asadangba sülen parnok ya ozüing alema aruba ta jangja-a temzüing ozüing dak ajemdaker jenjang tapet agitsü atema sota yuogo.

Pai ashiba agi, sota alirtem yagi India-i ozüing alema arrtsü nung ayong aser atsü nung tapok aliba adena aruba nangzükogo.

Parnok aika Delhi nung küm aika liya liasü aser parnok mapa

balala nung aayanga liasü.

Tanga meita aoba sentong ka nung police tem yagi Delhi Cantonment anasa Bangladesh nunger kinungtsü o kinungbo na den tanur ana pua liasü.

"Parnok ya Mohd Asad Ali, pa kinungtsü Nasima Begum, jabaso Mohd Naim Khan aser jala Asha Moni ta jangjaogo. Police-i ashiba agi, par kibong ya Delhi Cantonment temeket nung taoba küm 12 tashi liya liasü," ta DCP yagi ashi.

Parnok kati danga India lisopur kuli kaket tejangja magütsü. Ken o asüngdangba mapang parnoki parnok ya Bangladesh kübok Farooq Bazar Ajwatari, Phulbari Kurigram nungi ta nangzüka liasü.

Taoba küm December ita nungi tang tashi nung southwest district police-i Bangladesh nunger 142 puogo.

Karnataka BJP-i MLA ana küm 6 atema mintokogo

New Delhi, Monupii/May 27 (Agencies): Bharatiya Janata Party-i jenjang tesashi ka agia Karnataka nung par party nungi MLA S T Somashekar aser A Shivaram Hebbar na küm trok atema mintokogo.

BJP indang Karnataka tir B Y Vijayendra-i ashiba agi, party anema inyaksangshiba atema MLA anaprongla ya mintokogo, ta PTI sangdong ka ajanga metetdaksü.

Paisa, BJP lenirtemi mapang talangka sensak asemba sülen iba telemtetba ya agia liasü, ta ashi. ST Somashekar ya

Karnataka state assembly nung Yashwanthpur nungi aser A Shivaram Hebbar ya Yellapur nungi liasü.

Party inyakim nung aiben aibelenba atema iba tongtibang jenjang ya agia liasü, ta party indang Central Disciplinary Committee member secretary Om Pathak-i Hebbar dangi yokba official shiti nung shia liasü.

Shiti nungsa pa party nungi tangsa tang mintokba shia liasü.

"Party indang Central Disciplinary Committee-i, March 25 nü yokba show cause

notice dak sendakba nung nü telangzüba asadangogo aser nai party inyakim anema aiben inyaksangshiba ngutetogo," ta shiti nung shia liasü.

"Ken o asadangba dak ajemdaker na tang nungi küm trok atema party indang primary membership nungi mintoktsü telemtetba agiogo aser party nung tang nai kechi mapa bena ali idak nungjiagi na agintsür," ta shiti nungsa shia lir.

Osang agütsüba mapang tashi nung party nungi mintokba MLA ana yagi kecha telangzüba magütsü liasü.



Congress lenir Sonia Gandhi-i India indang mezüngbuba Ato Kilonser Pt. Jawaharlal Nehru asüba anogo pa bilemteta tetushi agütsüba noksa nung angur.

Terrorism ya proxy rara ka masü: Modi

New Delhi, Monupii/May 27 (Agencies): Ato Kilonser Narendra Modi-i Mongolbarnü, India-i joko kiralongrartem inyakim ya proxy rara ka ama magütsü aser May 7 nü Pakistan aser Pakistan-occupied Kashmir (PoK) nung kiralongrartem tesepe teku amakba ya temelenshiba mapang ka aser sentong yanglur India anema rara menaba atema telangzüba agütsüba ka ta shiogo.

"Tang tashi nung asenoki kiralongrartemi tesem balala amakba ya proxy rara ka ta ja aruogo. Ajisüaka May 7 [Operation Sindoor strikes] sülen asenoki iba ya proxy rara ka ta mejatetsü," ta Modi-i Gujarat semdangba mapang Gandhinagar tesem nung o jembidang ashi.

Modi Hombarnü Gujarat tongogo, koba pa PM kümer küm 11 ajungba nü liasü. Pai ashiba agi, kiralongrartemi April 22 nü Pahalgam amakba sülen armed force temi kiralongrar tesepe teku bushitet aser minute 22 tsüngda raksaja liasü.

Modi-isa, kiralongrartemi India amakba ya proxy rara ta joko ojang dang jatetsü, kechiyong Pakistan-i arrtsü aden amakba mapang tepsetba kiralongraratem atema state funerals ayongzüka kaja liasü. "Item kiralongrartem den asüpila sentong tem tu state-i sponsor asüba liasü. Parnok indang süngden nung Pakistan wako inoktsü aser parnok indang army-i salute süa laisü. Iba ya sentong yanglur inyakba mapang ka liasü. Iba ya sentong yanglur benokba rara ka lir," ta Modi-i ashi. Paisa, India-i kuli agütsütsü kecha nüngdak madoker, kechiyong



item kiralongrartem den asüpila sentong indang Pakistan-i lemsatepba video tem ya teperi lir.

Modi-isa, India o Pakistan na lemdangba indang jembi aser ashiba agi, kiralongrartemi mezüngbuba Kashmir amak aser linük litsü shilem ka bener oadok, ta ashi. Pai ashiba agi, kasa anogo ya kiralongrartem samatsü asübo iba tesem nung kiralongrar puti otsü ya balaka süla.

Pai ashiba agi, Sardar Vallabhbhai Patel-i PoK tanaben meyipa magi tashi Indian Army Kashmir nung toktsünüa liasü. "Sardar Patel-i ashiba anga Army-i PoK meyipa magi tashi nokdak asübo ken o balaka süla," ta PM-i ashi.

Modi-isa, Pahalgam amakba ya arrtsü aden rara aruba nung shilem ka liasü, ta ashiba den iba amala inyakim ya linüki küm 75 aremzüka aruogo, ta shisem. "Joko ojang dang aremzüksü," ta pai ashiba den linük nüjiso anguba mapang nungi minprongba ai agintsü mapang tongogo, ta shisem. "Rara shia India indang armed forces temi parnok awi chidaktsür. Pakistan-i parnoki makoktsü ta yimdangi aruogo anungji parnoki kiralongrartem pusemer," ta Modi-i ashi.

Chhattisgarh nung Naxalites 18 bendanga agütsüogo

New Delhi, Monupii/May 27 (Agencies): Chhattisgarh kübok Sukma district nung Mongolbarnü Naxalites 18 security forces nem bendanga agütsüogo. Parnok rongnung par ter atemabo ajak senteper sen lakh 38 agütsütsü nangzüker liasü.

Naxalites tem yagi Maoist ideology dak temulung mesüi police aser CRPF ketdangsürtem matsüngda bendanga agüja liasü, ta Sukma Superintendent of Police Kiran Chavan-i sangdong ka ajanga mettedaktsü.

Parnokisa, state sorkar indang 'Niyad Nellanar' (your good village) scheme agi parnok atsüa aruba indang lemsatep. Iba scheme ya kinük nung aliba yimtsüngtem terenlok atema aser surrender aser rehabilitation policy tasenba lir, ta pai ashi.

Chavan-i ashiba agi, bendanga agütsür aliba Naxalites, Madkam Aayta (25)

shiba Maoists PLGA battalion no. 1 nung platoon party committee züngsem ka lir aser Bhogam Lakhha (26) kasa battalion nung party züngsem lir, tena apuba mesüra tena aputsü atema osang agütsürtem nem sorkari sen lakh 8 agütsütsü nangzüker liasü.

Paisa, Madkam Kamlu (25) aser Laxman alias Madvi Chhannu (28) naprongla Maoists committee züngsem liasü aser tena atema sen lakh pongungu agütsütsü nangzüker liasü aser tanungba züngsem trok atema sen lakh anana agütsütsü nangzüker liasü, ta ashi.

Bendanga agütsüba Naxalites tem shia nem teyari sen 50,000 agütsüogo aser sorkar police dak ajemdaker rehabilitated sütsütsü ta ashi

Taoba küm Bastar tesem nung Naxalites 792 bendanga agütsü, kong Sukma densema district tenet densema liasü.



TIR YIMYIM YIMOBILEM (EDITORIAL)

DIMAPUR WEDNESDAY, MAY (MONUPII) 28, 2025

Aor ya aoer asü maoer ?

Naga nungertem rongnung Aotsür Aortem ya tejakleni aoer asü maoer ta asüba ya asenoki dang masü saka tangaria kanga jembir, kechiyong Aotsür Aortem ya tangar asoshi kanga tongtibang nübortem lir. Aji asünung, asenoki asenok asoshi inyaksü bilemba dang nungibo tangari parnok asoshi asenoki inyaksütsü imlaba tuluba lir. Ibaji asenok asoshi khuret aser tayongzükba tulu saka ano temoatsü aser maongka ta angateta inyaksüba mapa lir, kechiyong anisüngzükji khuret aliba agiang arur, anungji maongkajia khuret den külemi arur. Ajsüaka, asenok asoshi teshisadangtsü kaji, asenok Aor ya aoer asü maoer ta metettsüa tendangtsübaji kechi agi kechi nungsa tendang nung metettsü (?) ta asüba tasüngdangbaji asenoki tama jangjamatsüla. Aji oda, Aor tejakleni aobaji Nagaland government nung Aor chief minister asüba agi mesüra Chief Secretary asüba agi mesüra government mapa nung bureaucrats aser technocrats menden nung tulurtem aika aliba agi tendangtetsü asü? Mesüra, Aotsür Aortem rongnung business aser contract inyaker takar aika aliba agi asadangtetsü ? Mesüra tanela tsütsü Tsüngrem tenzükba mapa nung sayutsüngir aser Tsüngrem o sayur nüngtugu aika adokba agi tendangtetsü ? Mesüra, tazüng temetetba nung Aotsür Aor aikati Doctorate jenjang ngutetba agi Ao kin tejakleni odar ta kuli agütsütetsü asü ? Mesüra alima tesem balala nung Aotsür Aortem prokshia oagi alima aser Tsüngremer watang nung tongtibang shiem agia inyakba agi Ao kin tejakleni aoba kuli sayutetsü asü ? Itemji kodang bilemdangdir, atangji, government nung Aor tokolak ser tulurtem aika lira, asenoki asenok Aortem tejakleni odar ta bilemtsü südi. Kasaji, Aotsür Aortem rongnung tazüngba degree tulu akabatem aser takartem adokba agi asenoki asenoksasa tejakleni odar amai bilemtsüa akok. Aji oda, kodang asenoki asenok tanü jenjang ya taoba jenjang den medemdangdir, asenok tejakleni maoer amai asadangteter aser taoba anogotemang tajungba liasü ta bilema menungrar. Kasaji, asenoki dang masü saka tangar Naga nungertemi dena asenok Aotsür Aortem ya tejakleni aoer asü maoer ta kanga asadanga jembir. Aji oda, tangar Naga kintem nungi dena sayutsüngiri Aotsür Aortem dang asenok tashimait akümba indang shia ajungshiba aiben ajangshir. Itemji asenok karibo magizükteter saka ano karibo hau ta agizükteter. Ajsüaka, asenok tejakleni aoer asü maoer metettsübaji, tangari kechi ashir ta masü saka asenoki koma bilemer ta asüba nung asenok tia aser jenjangji keta lir. Atangji, tanübo Nagaland government nung tokolak masü aser government mapa nung tulurtema tasen aiterter dang nungibo kanga agi tanenertem teimba kümogo. Ibayongji, asenoki asenok ya tejakleni aotsü melen tesüleni aoer amai bilemer aser aiben nemjemer. Ajsüaka, Ao kin tejakleni aoba jenjangji government nung chief minister akümba agi mesüra tulur aika aliba agi asadangtsüba masü mesüra Reverend aser Doctorate aika aliba agia kin ka tejakleni ao maobaji masadangtetsü. Itemji tema tereprangtsü dang lir. Ajsüaka, shitakba kin ka tejakleni aoer asü maoer ta asadangtsübajibo, asenoki metetba aser inyaktetba agi asenok perir külenang tangar-a yariteter asü meyariteter (?) ta asüba agi asadangtetsüa akok. Kasaji, asenok menden nung mena meliaka, asenok Aotsür Aortem Nagaland nüngdakba shisatsü, nübo aser rongsen agütsüteter asü magitsüteter (?) ta asüba mapa agia asadangtetsü. Aji oda, tangari Aotsür Aor dak temulung alemer asü malemer (?) ta asüba kisüng agia Aor tejakleni aoer asü maoer metettsü. Ashiko, itemji kodang medemdanga asadangdir, asenoki asenoksasa asenok ya tejakleni maoer ta metettsüa akok. Aji shitak süra, asenok tejakleni maobaji asenok yimten yimsüsuba aser tulur menden nung nisung maliba agi masü mesüra rongsen maliba agia masü mesüra tazüng temeteter maliba agia masü saka asenok akaba aser metetba dang nungi asenoki inyakba ochimashi aser japujari mapa tuluba asüba agi asütsü. Ashi züngdangra, yimten nunga yimsüsür aser tulurtem taoba mapangtem dang nungibo tanüang teimba lir. Kasaji tashitemetet nunga doctorate angur agi sünga lir, Tsüngrem tenzükertema ajak amato ordain asür saka asenok akaba yimsüsür, tulur aser ordain mendentem aser tashitemetet jenjangtemji asenok meindang shisatsü aser ochimashiba mapa agi nembanga yur tejakleni mouteter. Item meindang shisatsüji enok nung dang asenoki metetmeteta aser nümadangdanga Ao kin tejakleni ao tenzüksü.

OLEMSABANG



(Yashi adok nungi...)

Editor, Nagaland Star Mokokchung	: 1978.
Chairman, ABAM Social Action Committee	: 1988-1996.
Member, NBCC Total Prohibition of Liquor Committee	: 1989-1995.
Member Nagaland Peace Centre	: 1992-1995.
President, NBCC	: 1999-2000.
Member, NBCC Total Prohibition of Liquor Committee	: 2001-2011.
Vice President, Nagaland Reconciliation Commission	: 2002-2004.
Member, Kohima Educational Trust	: 2005-2009.
Vice President, CBCNEI	: 2008-2009.
Chairman Peace and Justice, CBCNEI	: 2012-2015.
Peace Channel Governing Board	: 2016- till date.

Senpet Aser Khonang Anguba (Prize and Award)

Peace & Social Service Award, by Light & Salt, Changtongya Town	: 1991.
Millennium Award from OATT	: 2000.
Nagaland Peace Award, by Peace Channel, Dimapur	: 2009.
Guiding Star Award, Silver Jubilee, by Chungtia Laishir Telungjem	: 2016.
Lifetime Achievement Award, by Chungtia Students' Union	: 2019.
Conferred Honorary Doctorate by Senate of Serampore College	: 2021.

Alima Tesem Balalai Aoba

World Evangelist Conference by the Billy Graham Association, Amsterdam	: 1986.
Asia Baptist Federation Conference, Singapore	: 1998.
International Evangelical Conference, Indonesia	: 1999.
To Burma, to meet S.S. Khaplang & Gen. Khole for Peace and Th. Muivah and Consultation	: 1999.
To Bangkok, Thailand to meet Isak Swu and Th. Muivah and Consultation	: 2004.
To London, to meet Ms. Adino Phizo and Imkongangshi	: 2005.
International Peace Conference, Initiative for Change, Caux, Switzerland	: 2004.

Shisatokdentem nung Shisamolu Agütsüba

Ao Laishir Mungdang, Yimyu, 1983 : *Church and Society*.
 ABAM Central Council, Impur, 2000 : *ABAM Putipuyang - A Report*.
 India Sub-Continent Peace Conference, Henry Martin Institute, Hyderabad, 2006 : *Nagaland Political Issues and the Church*
 Guwahati, April 2006 : *Contribution of Christianity in Development of North-East*.
 Asia Pacific Conflict Transformation Consultation, Chiangmai, 2006 : *Overcoming Violence in Nagaland, India*
 Kohima, 2010 : *Significance of Indo- Naga Cease fire September 6, 1964*.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Odisha nung auyaba aser putir dak azükba police temi bushisüngdang

Bhubaneswar, Monupii/ May 27 (Agencies): Odisha nung Catholic seminary ka nung nok-nü bener arua jenjang aketba osettsüset ayuar Catholic putir ana dak teka sangshia yirutsüba indang police temi bushisüngdang tenzükogo.

May 23 anepdang Odisha state nung Kuchinda kübok Charbati nung aliba Carmel Niketan minority seminary telungi auer südi ta temulung melemi aliba nisung toku nungboka ai, ta Order of Discalced Carmelites indang regional vicar, Father Thomas Bose Velasser-i ashi. Iba seminary ya religious order ajanga ketdang asür.

Iba mapang iba seminary anepalur putir arishi küm 40 tain Silvín K. aser arishi küm 90 tain Linus George ya alena yur merenshi aser tena indang phone rakzüka bener ao.

Iba timtem atalokba mapang seminary ya azüng-azünger liasü, kechiaser kaketshir ajunga meyi sodi orr liasü, ta pai ashi.

Azü asangba angashir putir ana ya mejanga aliba sak aser auer temi merenshi, ta iba

seminary nung taoba mapang tesayur inyaka alisang Father Kishore Lakra-i ashi.

"Iba lendong atalokba mapang seminary nung putir aser sorochioker kisüng liasü," ta pai UCA News dang ashi.

Parnoki teyari meshia ola tulu adok, saka auer temi tena dak süng aser yindong agi azük aser sen aser jenjang aketba osettsüset bener ao, ta pai ashi.

Ghonda ana lir Father Silvín-i pa sasa alena aliba salatet aser torchlight amshia kimalen alir dang teyari meshia liasü, ta paisa ashi.

Par asemprong yiruba zübu anepalutsü asoshi anasa aliba mozüki kati anir ao.

Police temi tejak zübanger aruba auer tem jangjatetsü asoshi bushisüngdangba mapang lir ta ashir.

Odisha nung Khristanpur alidak auyaba aser rakzükraktepba ya tang tasen ka masü, ta Father Lakra-i ashi.

Pai Sambalpur diocese nung aliba Holy Family Church nung March 21 nü auyaba indanga athishia ashi, kong auer temi tekülem ki raksatsü aser yangji aliba tabernacle aser donation box auyaer ao.

Sambalpur diocese nung aliba arogo ketdangsür temia Titilagarh, Balangir district nung aliba tekülem ki telungi auer tem aita tabernacle aser sen ayuar ao saka donation box anasa aliba Mother Mary indang keraklong bo meraksatsü, ta shia liasü.

Iba diocese yagu Odisha nung arem aser tekong-tenem tem awajemer, koba tasazük 9,675 square kilometres shi lir. Iba tesem nung nisung 8 million dak tema alir aser yangi Catholic nung 48,000 shi lir.

Odisha nungya Hindu yimsü akhanga amshirtemi Khristanpur reshikangshia amshiba lir.

2008 küm Kandhamal district nung Khristanpur anema azüdokshi tamajungtiba rongnung ka ataloka Khristanpur nisung 39 tepset aser nisung 70,000 shi talidak ki makai akum, ta sorkar ketdangsür osang ajanga ashir.

Iba mapang nisung 100 asü ta ashir aser Khristan tsür 40 shi Hindu nung teloki tim masüba mapa inyaka amshi.

Iba mapang tekülem ki 100 aser nisung aliba ki 5,000 nungi 6,000 tsüngta raksatsü.

ANOGO ABEN TSÜNGREM DEN

Khristaji yimjung yanglusang

"Kechiyong Pa, shibai Yihuda nunger aser bendanger anaji ka kümdaktsü, aser tetsüngda nung aliba balala kümdaktsüba jara raksatsü, Pa asen yimjung" (Ef.2:14)

Asen lokti libaliro nung telem dang ana lir. Takar sensaker aser tashir, mashir. Tongtipangsa tanü lokti nung sensaker aser mashirji kanga dang tajemrepba tia nung yutsür. Saka, Tsüngrem alimai arubaji iba telemsabaji bener maru saka jungtepshidaktsütsü asoshi aru. Ibaji Efesa 2:11-12 nungji sayur.

Yihuda nungeri bendangertemji kanga dang mezüngmeshi-a memejeptokba ta aja, senso maliba kin aser temeshi tenangzükba nung teimla maka nüburtem, aser parnokji Tsüngrem ochi temetetba maliba ta sensatsü. Yisu Khristai Yihuda nunger aser bendangertem na anasa arudaktsübaji Pa senti zü kangki nung indokba ajanga liasü. Nisung-i yangluba artsü ya Khristai samatsü. Tsüngrem shiba Khrista lir, paji yimjung yanglur aküm aser paji asen yimjung lir. Anungji, Khristai koma telem dang ajak samatsü, asenoki ajak den ka kümer Tsüngremi yangluba yimjung nung lidi.

Bishop anema longkak aitba Kerala nun-i arogo yutsüogo

Thiruvananthapuram, Monupii/May 27 (Agencies): Nun ka dak tashiyim amshia shi nung medem ta bishop ka dak tai tonglokja campaign aniba India nunger nun pongu rong par asem-i pei arogo yutsüogo aser tesüsa yutsüla ya ita ka tejakdang lir, ta nun tem bhukumba Catholic putir kati ashi.

Iba timtem ajurur aliba nun indang odongtar ama inyakla Sister Anupama Kelamangalathuveli ya Missionaries of Jesus yutsür rongnung tasembuba liasü, ta nun tem bhukumer Capuchin Father Dominic Pathiala-i ashi.

Iba ken o nung tai tonglokja alisang Bishop Franco Mulakkal ya iba mapang Punjab nung amendaker Jalandhar diocese nung bishop inyaka liasü aser nuns' diocesan congregation nung patron ka liasü.

"Sister Kelamangalathuveli-i arogo yutsütsü telem tetba agiba osang iba arogo indang superior general nem metetdaksüogo," ta Pathiala-i May 26, 2025 nü UCA News dang ashi.

District court kati iba rape case nung Mulakkal medenja aliba ano Kerala High Court nung benokshia jembu tenzüksü lia nun tasembuba arogo yutsür aor.



Bishop Franco Mulakkal aputsü takhangba agüja September 20, 2018 nü Kochi, Kerala nung longkak aitdang Sister Anupama Kelamangalathuveli-i nüburtem den jembiba noksa nung angur.

Kelamangalathuveli ya kidangi sodi orr ita ka dak tema lir. Lai lar kinunger den shisa agitepba sülen arogo yutsütsü telem tetba agi, ta Pathiala-i ashi.

Nun tem asoshi Kelamangalathuveli ya media aser dangartem den jembir tongti ka liasü. Lai iba timtem ajurur alirtem otsü ashi aser lai temulung agüja bhukuma liasü.

Tang convent nung nuns asem dang lir - timtem ajuru alila aser la bhukumer ana.

"Onoki maneni par asem yaritsü," ta Pathiala-i ashi.

Kelamangalathuveli mesüra arogo yutsüba nun ana yagia

parnok arogo yutsütsü telem tetba agiba mesüra iba ken o indang yimjak nung sangdong kecha agüja mali.

Jalandhar diocese indang Bishop Franco Mulakkal aputsü khanga Kerala nung nun pongu yagi anir nüburtemi longkak ait tenzüka iba otsü temai adok.

Mulakkal-i 2014 aser 2016 tsüngta Kerala state kübok Kottayam yimti nung la aliba tesem semdangba mapang la dak 13 ben tashiyim amshia shi nung medem ta former superior general-i tai tongloktsüba sülen iba ken o ya 2018 küm June ita tenzüka liasü.

Parnoki iba tatalokba indang ashishitepa ken o benokba Vatican densema arogo ketdangsür temi senzüka yutsüba sülen police nem osang agütsü ta nuns temi ashi.

Nun temi longkak aitba ngua nüburtemi parnok bhukuma nokdak aser iba sülen Mulakkal ta September 2018 nung apu.

District and Session Court of Kottayam nung iba ken o benoka jembidang Mulakkal-i item taitsüba kata magizük aser iba sülen pa January 2022 nung medentsü.

Pa mapudang Vatican-i 2018 küm bishop ya khen atema mapa nungi anisüngzük agütsü

aser pa temeden ngur mapang tatsüka tsüngta 2022 küm bishop nungi anena liasü.

Iba ken o tenzükba mapang nungi nun pongu - Josephine Villoonnickal, Ancitta Urumbil, Neena Rose, Anupama Kelamangalathuveli, aser Alphyl Pallasseril - aser timtem ajurur alika ya Kerala indang Palai diocese telunghzük nung Kuravilngad kübok yimtsüng ka nung parnok indang convent nung par arogo mesüra arogopuri teyar medeni liasü.

Tamalane Josephine Villoonnickal aser Neena Rose na arogo yutsü. Parnok ajak private mapa inyaker ta ashir.

AO OSHI ANGAZÜKDAK:**TANÜ ANGAZÜKTSÜBA OJANG****Tenendak**

(adv) temulung agüja inyakba (steadfast, caring)

* Mapa ajak nung tenendak nisung nüngdaker.

Tenanya

(adj) wakong sentsü (yellow)

* Tzümartemi tenanya sentsü kanga meimer.



Tir Yimym

OLONG PAITEP # 7164

1		2			3		4		5
				6		7			
8									
						9			
			10						
11									12
					13			14	
15									
16							17		

TIPLIN

- Nüji masü
- Techinütsüka
- Aketa shirangba
- Pi
- Amena
- Kinü
- Tanang masü
- Lenmang
- Nübo tedi
- Tuoshi
- Shiruru apuba temenatsü

- (4)

- (6)

- (5)

- (6)

- (5)

- (5)

- (5)

- (6)

- (5)

- (6)

- (4)

LANGTSÜNGLEN

- Jila tulu
- Sarasademdang tembang
- Tarutsü indang ashirtem
- Alia
- Mojing
- Tai inyakba metet
- Medemer hijiba
- Tatokba / Amadok
- Anüngdang masü
- Jabaso masü

- (5)

- (4)

- (6)

- (5)

- (5)

- (5)

- (6)

- (5)

- (5)

- (4)

OLONG PAITEP # 7163 TELANGZÜBA**TIPLIN :**

- Tesangra, 5. Mungo, 7. Kisen,
- Salem, 12. Semki, 14. Kilem,
- Kensü, 16. Sangpang.

LANGTSÜNGLEN :

- Temesen, 2. Raksa, 3. Aon,
- Aso, 6. Nile, 9. Alizüng,
- Omen, 11. Lemta, 13. Ola,
- Kin.

NAI-A YA METETTER MA

Kolkata nungi Arnav Daga-i anogo ka nung Guinness World Records pezü tashi yanglutetogo. October 19, 2024 nü arishi küm 15 tain Arnav-i ghonda 1, ghonda 8, ghonda 12 aser ghonda nung playing cards azükleni amentepa atutsü otsü yanglutsü meranga liasü. Iba anogo pai "tallest house of cards built in one hour, eight hours, 12 hours and 24 hours" otsütem yangluteta liasü.

Amit Shah-i Manipur tensa mazüokteter: Congress**Imphal, May 27, 2025**

(Agencies): Home Minister Amit Shah-i Manipur nung tensa mazüokteter anungji pa menden nungi alutsüla ta Congress-i metetdaksüogo.

April 26, 2025 nü Manipur Governor Ajay Kumar Bhalla-i Imphal atongba sülen lungkak aiterem paitoktsü atema Army helicopter ka nung Kangla Fort tashi kilometer ishika aotsüsa akümba sülen Congress-i Amit Shah dak tai tongloktsür.

Lungkak aiterem Tiddim Road nung Kwakeithel area nung adenshi aser parnoki Raj

Bhavan tashi tetsüing agi jajaa aotsü sentong atong.

Ajisüaka, kaketshirtem aser tetsür teloktemi Imphal airport nungi Keisampat tashi kilometer 6 tashi human chain ka yanglu. Iba ajanga Tiddim Road nung central forces mapa lezmüksü.

Lungkak aiterem adenshia aliba atema Governor Ajay Kumar Bhalla-i Army helicopter ka nung Kangla Fort tashi ao.

"Manipur nung President's Rule ajanga temelenshi kecha bener maru" ta Congress general secretary in charge communications Jairam

Ramesh-i ashi.

"Tanü Governor-i Imphal atongba sülen par kidangi aotsü atema Kangla Fort tashi helicopter ka nung aotsüsa aküm. Külen, Prime Minister bo tesem balala nung filmi dialogues jembir aser Operation Sindoor ajanga politics inyakker saka Manipur atemabo mebilemtsür" ta pai ashi.

"Union Home Minister-i tamakok tulu nguogo aser Manipur nung pa ketdangsüba kübok tensa mazüoktetba atema menden toktsütsüla" ta Ramesh-isa ashi.

Pradyot-i MLA tem dang Bangladeshi nunger jangjatsü tuyur**Agartala, May 27, 2025**

(Agencies): Tipra Motha Party founder Pradyot Kishore Debbarmen-i par MLA tem dang pei pei constituency nung ozüng alema aruba Bangladeshi nunger jangjatsü atema mapa inyaktsü tetuyuba agütsüogo.

Debbarmen-i live social media broadcast ka nung jembidang Ministry of Home Affairs ajanga ozüng alema arurtem jangjatsü aser item nisungtem meyipa yoktsü tetuyuba agütsüba indang nenshia ashi.

Tipra Motha-i mapang talangka iba tebilemtsü atema jembia arur ta Debbarmen-isa ashi.

"Onoki iba lendong ya kanga jelia nungi meteta liasü. Ni ozü MLA tem dang ozüng alema arur nisung ajak metettsüsa inyaktsü shiogo" ta paisa ashi.

Tripura-i Rohingya aser Bangladeshi nunger aruba ya kanga zübazüba magitsüla ta Debbarmen-isa metetdaksü.

"Parnoki rations agir, India nunger meyong resources meshir aser voter ID cards dena yanglur. 2028 tashi nungbo parnoki Tripura political landscape nung shilem tulu agitsü" ta pai tebilemtsü onük lemsatop.

Gomati District Magistrate Tarit Kanti Chakma-i Debbarmen den ajuruteptsü memulungba atema ashishitep

ken o adoka lir.

Deobarnü Debbarmen-i Ampa aser tanga tesemtem nung welfare aser development onüktem jembitsü atema Kanti Chakma den ajuruteptsü ao saka majuruteptet. Iba tatalokba ya social media nung kanga prokshi aser nisung karibo iba ajanga Tripuri kintem aser Chakma nunger tsüngda mepetmesü aliba sayur ta ashi.

"Ni pusema nungitba Chakma nunger aika ni akhümtsübur. Kechi atalokogo, iba ya kin kati masü saka kija kati inyakba lir. India aser tangalen aliba Chamka nunger ni pusema nungiter" ta Debbarmen-i jangjashitsü.

Mizoram sorkar mozü kitem nung tissue & kidney transplants sütettsü**Aizawl, May 27, 2025**

(Agencies): Mizoram sorkar mozü kitem nung kobi melii tissue transplants tenzüksü aser iba ajanga state medical science nung tapak tasen ka lapoktsü ta Health Minister Lalrinpuii-i ashi.

Mizoram nung mozü ki tulutiba Aizawl Civil Hospital nung osangbenertem atema free health check-up sentong lapoktsüdang Lalrinpuii-i "civil hospital nung Cardiology operation theatre (Cath Lab) ka amenoker aser iba ajanga health facilities aika teyari angutsü" ta ashi.

Aizawl Civil Hospital nung kidney transplantation sütettsü kechiyong designated operation

theatre ka yangluogo aser Centre nungi license nguogo ta paisa ashi.

Mezüng nungbo tangalen nungi surgeons mesüra experts anir arua kidney transplants asütsü aser local surgeons nem training agütsütsü ta Lalrinpuii-isa metetdaksü.

Falkawn nung Zoram Medical College and Hospital (ZMCH) nunga operation theatre ka amenokdar aser iba nung open heart surgery agitsü ta laisa ashi.

Nija mozü kitem nung open heart surgery nung Rs 8 lakh shi agir saka ZMCH nungbo Rs 1.5 lakh shi dang agitsü ta Minister

Lalrinpuii-isa ashi.

April 1, 2025 nü tenzüka Mizoram Universal Health Care Scheme (MUHCS) ya state nung healthcare schemes tenzüka arubatem rongnung tajungtiba lir ta laisa metetdaksü.

Ita ka shi tsüngda healthcare scheme tasenba ajanga nisung aika tajangzük nguogo. Mizoram nung non-salaried families mesüra non-government employees-i iba healthcare scheme nung register asütsü aser küm nung kibong shia Rs 5 lakh cover agitsü ayongzükta ta Lalrinpuii-isa ashi.

China aser Gulf linüktem den ASEAN senden tenzükogo



Kuala Lumpur, Monupii/ May 27 (Agencies): Southeast Asian lenirtemi China aser züngsem trok aliba Gulf Cooperation Council (GCC) den tang mezügbuba senden mentar.

Iba senden ya züngsem ter aliba Association of Southeast Asian Nations (ASEAN) annual summit Malaysia yimtiba Kuala Lumpur nung tenzükör ananü buba Mongulbarnü amener.

Tang ASEAN nung Malaysia menden lir, kong Brunei, Cambodia, Laos, Myanmar, Philippines, Singapore, Thailand aser Vietnam lir.

Iba senden sülen ASEAN aser GCC lenirtem tsüngta jembishinü balala alitsü. GCC nungya Bahrain, Kuwait, Oman, Qatar, Saudi Arabia aser United Arab Emirates lir.

Malaysia Ato Kilonser Anwar Ibrahim-i ASEAN-GCC summit tenzükja jembidang, blocs ana tsüngta tesendaktep nung tashi tali aitba ajanga külemi maparen balala inyakba ulushitsü, tashi itshitsü aser yimchiyimjung alitsü ta ashi.

"ASEAN-GCC partnership ya tanü dang nungi tali tongtipangba meliasü südi ta ni amanger, kechiaser rongsenketzüng tsütsü tejangja mali aser geopolitical tsütsü tayongzükba agi aliba tali benjar aliba mapang ka lir," ta Anwar-i ashi.

Senden metenzük dang ato kilonseri tezüluba ka nung, "geopolitical order" melenshiba mapang ka tenzuka lir aser tawa US-i par mulungka agi tariffs meshiba ajanga global trading system tali tamajungba akumer, ta ashi.

Hombarnü Kuala Lumpur tonga arusang China Ato Kilonser Li Qiang ya tang mezügbuba ASEAN aser GCC senden nung adentsü. Pai Hombarnü Anwar ajuru aser Beijing, ASEAN aser GCC tsüngta shishilempaba aser investment tesendaktep ulushitsü ayongzuka liasü.

"Unilateralism aser protectionism tali akumba mapang aser alima rongsenketzüng ainba nung terenlokba malidang, China, ASEAN aser GCC linüktem

tesendaktep tashi itshitsüla aser regionalism aser multilateralism asoshi pokbaa inyaksüla," ta Li-i ashi.

Telok asem tsüngta rongsenketzüng tsütsü tesendaktep tajungba akumtsü aser alima nung timtem balala nung telangzüba agütsütsü asoshi China-i Malaysia den inyaksü mulunga lir, ta Li-i Anwar dang ashi.

ASEAN-i ajak den sako police amshia aru aser Beijing aser Washington den tesendaktep ayu, saka US Tir Donald Trump-i amokmerenba ajanga mopung melenshia aoner.

Bloc indang züngsem trok dak tamajungtiba kongshia tariffs ya shilem 32 aser 49 tsüngta meshir.

Trump-i alima nung linük timba asoshi tariffs ya anogo 90 anena atatsü April ita sangdong aser tan ita China den iba mesük tezüngzüktep ka yanglua liasü.

Anwar-i Trump dang taküm ASEAN-US summit ka asoshi mepishia zülü, ta Hombarnü ashi, saka Washington nungi telangzüba agüja mali ta ashir.

Ukraine-i yimjung atema sensaksem raksatsütsü meranger: Russia

Moscow, Monupii/May 27 (Agencies): Russia indang defence ministry-i Mongolbarnü ashiba agi, Moscow-i Kyiv den yimjung atema indang indanga sensaksemtsü asoshi jenjang agiba raksatsütsü atema Europe nung aliba linük kari teyari agüja Ukraine-i jenjang tamajung kar agiogo.

Küm asem dak tema süia aoba sülen Russia aser Ukraine na May 16 nü mezügbuba indang indanga sensaksemogo, saka ceasefire atema tangatettep ka dangi arua sensak mesemtet.

"Russian Federation-i achaayanga, Ukraine nung tang mangatettep adoker aliba bentettsü atema Russia aser Ukraine na indang indanga senasksemtsü asoshi

tenzükogo," ta ministry-i ashi.

"Kasa mapang nung Europe nung aliba linüktem kari teyari agüja Kyiv-i iba sensaksem minprongtsü atema jenjang tamajung kar agiogo," ta ministry-isa ashi.

Russian ministry-i ashiba agi, May 20 nü nungi Ukraine-i drone aser missile amshia Russia nung tesem balala tali amak tenzükogo. Parnoki anüolen aliba linüktemi agütsüba prangbong injang amshia civilian tem aliba tesem maka arudar.

May 20 nü nikongtsütsü nungi May 27 anepdang tashi nung Russia indang air defence system temi Ukraine nung indang drone 2,331 raksatsüogo, kong drone 1,456 bo mangatettep adoker aliba tesem nungi pilar khadanga

liasü, ta ministry-isa shisem.

Kasa mapang nung Ukraine-ia, Russia-i par litsü tali amakba indang ashishiogo, kong Honibarnü aonung kanga sashia amakba densema lir.

Russia-i asendenshir Ukraine kübok tesem balala tali amakba ajanga US tir Donald Trump-i Russia tir Vladimir Putin ya khenyongi meshidak kümogo ta ashiba den tenokdangba tasen agütsütsü amokmerena liasü.

Russia indang defence ministry-i Mongolbarnü ashiba agi, parnoki Ukraine kübok tesem balala amakba ya parnok amakba atema telangzüba gütsüba lir aser parnoki Ukraine indang military-industrial complex telung nung military facilities aser enterprises tem dang amaker.

MULUNG NEN



ASO :
27/03/1943

ASÜ :
21/05/2025

Onoki teti meima aliba tsürabur, asür **SENKANANGDEN JAMIR** (Longmisa) arishia lir ajungben ali wadang tembangba mapang nungi tenzuka mangyim jashi mapang shirnokisa ozü den nübo, rongsen, shisatsü aser sarasadem agi yaritepa nungitogo; kinüngertemi nenok ajak dang kanga pelaba lemsateper. Talisa kiyonger, yimer, temeimertem, Arogo aser lokti tentet balalai ozü mangyimba mapang tsüngdong arua lenmang balala ajanga yaritepba atema ajak dang kanga pelar.

Nenok mapa tajung asoshi temoatsüba Tsüngremi nenok ajak moajang ta sarasademtsür.

~Temeim Kinüngtsü, Chirnurtem, Semchirtem aser Kinüngertem.

**Ao Theological Association-i PELABA LEMSATEPER**

Mokokchung Yimtak Ao Theological Association, 33 Buba Kümsem Inti Mungdang 2025, Monupii (May)23 nungi 25 tashi aka dang, Mokokchung Baptist Arogoi iba mungdang achaayanga tajungtiba rememja, shisatsü, rongsen aser nübutem mulungsoa tenlaba asoshi Ao Theological Association Office ajanga kanga pelaba lemsateper.

Tsüngremi Mokokchung Baptist Arogo, Mokokchung Laishirtem, Planning Committee-tem, Mokokchung Yimden, aser Sensopur ajak Tsüngremer temoatsü agi putu jenti moajangma.

Sd/-
Rev. Sentimeren Jamir
Tir
Ao Theological Association

S Korea-i taoba mapang acting tir ana nem tenokdangba agütsü



Han Duck-soo

Choi Sang-mok

Seoul, Monupii/May 27 (Agencies): South Korea nung ketdangsürtemi taoba mapang acting tir ana nem senzügenpongtsü atema tenokdangba agütsüogo, koba taoba tir Yoon Suk-yeol-i martial law benokba ken o bushisüngdang nung shilem ka lir.

Police-i taoba Ato Kilonser Han Duck-soo aser ex-Finance Minister Choi Sang-mok na May tom nungi bendangleni maotsü asoshi tenokdangba agütsüogo, kechiyong tena ya sorkar anema nokdakba ken o nung temulung meleme bilemertem ama züngshir, ta Yonhap news agency-i Mongolbarnü metetdaksü.

Yoon, shiba küm asem tashi tir liasü, pai 2024 küm December ita emergency martial law sangdonga liasü. Pai State anema nokdakertem aser North Korea nung den sendaka alirtem sorkar inyakyim nung densemogo ta shia linük yimtiba yimtongi sepaitem yoka liasü.

Ajisüaka iba ozüng benokba ya mapang tatsüka dang lir parliament-i agintsü aser iba sülen South Korea nung temzüng ozüng dak sendakba

nung mepetmesü adoka Han aser Choi naprongla acting tir ama inyaka liasü.

Yoon-i martial law benokba nung parnok shilem indang taoba acting tir tem dang special police unit kati Hombarnü ken o ashishiogo.


Pa mapa nungi aginba sülen parnoki ashiba ama iba jenjang anema parnoki nokdak menokdak iba indang ashishia arudar. Yoon ya taoba ita mapa nungi officially aginogo. South Korea indang Constitutional Court-i, pai linük yimtibai sepaitem yoka pa tashi alia amshiogo ta shia obendang agüja liasü.

Military aser police ketdangsür tejentemi ashiba agi, parnok dang yimden yimsüsü nung sorkar anemertem aputsü atema tetuyuba agüja liasü.

Taoba tir ya tang obendang mapang ka lir aser pa taküm tepeyong tepuokdak ayutsü mesüra tasüba agi merenshitsü akok. Aibelena aliba ngutetra pa ya South Korea nung tirtem rongnung ozüng agi aitsüba tir tasembuba asütsü.

South Korea nung Yoon melener shimtsü atema taruba ita election agitsü renema lir.

Asian Athletics C'ships nung Gulveer Singh-i gold angu



Monupii/May 27, 2025 (Agencies):

Reliance Foundation athlete aser national record bena alisang Gulveer Singh-i tang asaya aliba Asian Athletics Championships nung Mongolbarnü mezügbuba anogo India atema mezügbuba gold medal nguogo. Pai tebur 10,000m race nung gold medal nguua liasü.

Arishi küm 26 tain Asian Games bronze medallist yagi alizüing minute 28 ser second 38.63 nung tongteta gold medal nguua liasü. Pai taküm küm tetenzüklen 10,000m race nungsa alizüing 27:00.22 nung tongteta national record ka yanglur liasü.

Kasa asemtepbä nung Japan nung asayar Mebuki Suzuki-i

alizüing 28:43.84 nung tonga silver medal aser Bahrain nung Albert Kibichi Rop-i alizüing 28:46.82 nung tonga bronze medal nguua liasü.

Mongolbarnü India nung asayartem rongnungi Servin Sebastian-i tebur 20km race walk event nung mezügbuba medal angu. Pai iba asaya nung alizüing ghonda ka ser minute 21 ser second 13.60 nung tongteta bronze medal ka nguua liasü.

Iba asaya nung China nung asayar Wang Zhaozhao-i alizüing 1:20:36.90 nung tongteta gold medal angu aser Japan nung asayar Kento Yoshikawa-i (1:20:44.90) silver medal angu.

Iba asayamung nung Sebastian-i alizüing tongtetba mapang ya pa indang personal best 1:21:23 dang nungi tera agi dang ishiba liasü, koba pai taküm February ita Uttarakhand National Games nung ajangzükteter lir. Kasa asaya nung India nung rongnungi Amit-a asaya aser pai alizüing 1:22:14.30 nung tongteta pezügbuba nung tembanga liasü.

Iba asayamung atema India-i asayar 58 yokogo. Iba asayamung nung taoba küm India team-i medal 27 nguua liasü.

Singapore Open: PV Sindhu tanabuba round-i iogo



Monupii/May 27, 2025

(Agencies): Olympic nung medal ana tashi ngur alila PV Sindhu-i Mongolbarnü Singapore Open Super 750 tournament mezügbuba round nung Canada tsür Wen Yu Zhang straight games nung koka tanabuba round tongtetogo.

Sindhu-i iba asaya ya minute 31 nung dang 21-14, 21-9 agi koka liasü.

Mezügbuba round ayonga yonga kokaka Sindhu atema tanabuba round akoktsü melarabo masütsü, kechiyong la Tokyo Olympics gold medallist aser tang world No. 5, China tsür Chen Yu Fei den asayatsü lir.

Ajisüaka India nung tanungba asayartem atema Mongolbarnü tezüdangtsü anogo ka liasü. Malvika Bansod, Anmol Kharb, Priyanshu Rajawat, aser Kiran George nung ajak mezügbuba round nung tsükogo.

Malvika aser Priyanshu napronglai mezügbuba setbo akok saka asaya mekotteti

liasü. Malvika-i 21-14, 18-21, 11-21 agi Thailand tsür eighth seed Supanida Katethong makok aser Priyanshu-a seventh-seeded Japan nung shuttler Kodai Naraoka-i 21-14, 10-21, 14-21 agi koka liasü.

Kasa mapang nung Anmol-a Chen-i 11-21, 22-24 agi koka liasü. Anmol-i tanabuba game nungbo kanga meranga asaya saka takok mongutet.

George, shiba taküm küm tetenzüklen India Open quarterfinal tonga asaya liasü pa China nung asayar Hong Yang-i 19-21, 17-21 agi koka liasü. R. Santhosh Ramraj-a South Korea nung asayar Kim Ga Eun-i 14-21, 8-21 agi tsükdaktsüogo.

Tarep temeyoktepb asaya nung India nung tarep Dhruv Kapila aser Tanisha Crasto na China nung Cheng Xing aser Zhang Chi nati 18-21, 13-21 agi koka liasü.

Ashith Surya aser Amrutha Parmuthesh nati 11-21, 17-21 agi Japan nung tarep Yuichi Shimogami aser Sayaka Hobara na makokba sülen tsükogo.

2026 Winter Olympics nung Russia masayadaksütsü: IIHF tir



Monupii/May 27, 2025

(Agencies): International Ice Hockey Federation (IIHF) tiri, 2026 Winter Olympics nung Russia masayadaksütsü atema International Olympic Committee (IOC) sentong aliba metetdaksüogo.

Luc Tardif-i Deobarnü taruba asayamungtem nung aser talisa Milan aser Cortina d'Ampezzo, Italy nung taruba Winter Games nung Russia-i shilem agitsüba dak sendakba nung sensaksema liasü, ta HockeyNews.se aser Hokej.cz nati metetdaksü.

"Iba asayamung ya IOC-i ayongzüker aser onokibo hockey asayamung dang achaayanger," ta Tardif-i ashi. "Onoki parnok dang telemteba ka agitsü atema mepshia asüngdangogo, kechiyong Olympics tonga arur aser parnok nem osang agütsütsü nüngdaker."

"Tawa parnoki Russia medeni mapanglem ka agütsütsü onok dang mepshia asüngdangogo, anungji tang tensaji yamaji lir. Official osang ka magütsü saka IOC-i onok dang Russian Olympic Committee dang parnok Olympics nung shilem magidaksütsü telemteba agiba indang metetdaksüogo ta ashi," ta paisa shisem.

2022 küm nungi tenzüka Ukraine amakba atema Russia ya 2024 küm Paris nung Summer Olympics nung masayadaksü. Russia nungi asayartem tokteptsü atema melaogo, saka linük wako kübok tokteptsü memelai liasü.

IOC official sangdong ka tang tashi agüja mali. Russia tembar Belarus-a Olympics nung masayadaksütsü imlar.

Russia nung 2014 küm Sochi nung Winter Olympics ayongzüka asaya aser parnoki

Winter Games trok tashi nung gold medal 46 nguua lir. Soviet Union-i gold medal 78 nguua liasü.

Winter Olympics ya February ita tenzüksü aser iba atema renemshi tenzükogo. Iba asayamung atema tebur aser tetsür ice hockey team tem shima telok balala küma lemsaogo, kong Russia aser Belarus na densema mali.

Kyrgios temekok yiruba ajanga French Open masayatetsü

Monupii/May 27, 2025

(Agencies): Nick Kyrgios' French Open nung 2017 küm sülen taküm mezügbuba asayatsü atema kanga yongyaseta ata liasü, saka temekok yiruba ajanga masayatetsüsa kümogo. Pa Jordan Thompson den tarep asaya asayatsü liasü.

Arishi küm 30 tain asayar ya 2022 küm Wimbledon nung final tonga asayaba sülen tetsüing, temekok aser tekatsüla yiruba ajanga kanga timtema arudar aser pa taküm kija asaya pezü nung dang asaya liasü.

Kyrgios, shiba Roland Garros nung tatemsa küm ti tejakdang asaya liasü, pa Paris nung pa indang media inyakyim pusema Thompson indang regular doubles partner, Max

Purcell melena asayatsü sentong yanglur liasü. Purcell ya tenokdangba agütsür aliba mozü amshiba atema tang asaya nungi tenokdangba agütsür lir.

"Nick idaki asayatsü kanga yongyaseta liasü. Pai kü dangi hoptashia message yoka ni Roland Garros nung tarep asaya atema renema ali mali ta asüngdanga liasü," ta Thompson-i Hombarnü Roland Garros nung Australian media dang ashi.

"Ni pa Australia nung clay nung training agidar ta meteta liasü, saka anogo ishika tejakdang Nick-i pa temekok

yiruba indang metetdaksü aser ibayongji pa marutet. Pa kanga tezüdanga liasü. Paisa, pai ano yiruyipong kwika agitetsü mejangja ta shiogo aser pa atema aria bilemstür, kechiyong pai media nung kechi shidir shiang pai tennis asayatsü aser court-i aitsü meimer ta ni amanger," ta Thompson-i ashi.

Nick masayatetteüsa akümba sülen Thompson, külem Australia nung asayar Jason Kubler den asayatsü aser tena mezügbuba round nung France nung tarep Quentin Halys aser Albano Olivetti na den asayatsü.

BILEMDANGANG

"Mokorai aliba ajanga tebilemstü aika nungi jenbor."